

Sra. Bernadina Growell, “Mama di Cultura” a bay laga nos



ORANJESTAD – Ayera e folklorista, sra. Bernadina Growell kende ta ser considera “Mama di Cultura” a bay laga nos.

Sra. Bernadina tabata un persona masha stima y aprecia pa su talento den diferente tereno artistico. Un dama Arubiano cu a gana respet como actriz, cantante, compositor, maestro di musica y cultura, ademas di un maestro extraordinario den cuminda y cos dushi crioyo.

Bernadina Growell Kock a nace dia 27 di februari 1939 y ta yiu di Fransisco y Bonaventura Kock-Geerman.

PERFIL

Bernadina su bida artistico a cuminsa ora cu e tabatin 12 aña, actuando y cantando na scol.

For di chikito caba e tabata canta den koor di misa. Su prome salida ‘publico’ como artista a sosode tempo cu e tin 17 aña, hunto cu su ruman Mariana Kock. Nan tabata canta cu Trio Brasil y despues cu

Trio Las Campiranas cu ademas di Bernadina y Mariana, tabata forma pa Lucrecia Stamper.

Nan canticanan ta zona te dia di awe ainda, specialmente “Un Soño” cu a keda graba pa gruponan di Aruba y tambe na Colombia. Pero, ademas di forma parti di un trio femenino, Bernadina a acompaña varios grupo y cantante di Corsow y Boneiro.

Hopi di su canticanan a keda graba na Aruba y den exterior. Su prome cantica “Mala Suerte” tabata graba pa Rudy Plaate, e famoso cantante y compositor di Corsow kende su canticanan ainda ta razona na Aruba y Antiyas. Bernadina tambe a graba cu grupo Maya na Bogota, Colombia. E canticanan cu a graba ta ‘Ta Carnaval 25’ y ‘RaRaRa.’

Den su 69 aña di bida, sra. Bernadina Growell a laga atras un historia cultural amplio skirbi cu talento y amor pa arte, specialmente musica. Cu sra. Bernadina sosega na paz.